



Entamez la vischnanca è l'unica scola primara sutsilvana.




Sper la posta pon ins laschar cussegliar da Christian Hassler areguard energias alternativas.

Donat – ina vischnanca cun avegnir

DA FLURIN ANDRY / ANR

■ Giusum la costa da la Muntogna da Schons sa chatta Donat. Auter che en las bieras vischnancas alpinas nua ch'ils giuvenns mancan adina pli ferm vivan qua per il mument 41 uffants.



Il viandant che viagia per l'emprima giada tras la chavorgia stretga da la Viamala vegn ad esser surprais che la val s'avra tut en ina giada ed è pli amabla. Cur ch'el arriva a

Ziràn vesa el da l'autra vart dal Rain sin ina bella sponda da prada las differentas vischnancas da la Muntogna da Schons; Pazen, Farden, Lon, Maton, Casti e Vargistagn. Giusum quella costa, sin in delta verd sin 1027 meters sur mar, sa chatta Donat.

Chasas fitg veglias

La vischnanca consista or da quatter parts, il pli datiers a la Viamala è il quartier Tsharvi, entamez vegn Turvasch e da l'autra vart, vers sid sa chatta la part Curscheglias. Sisum la vischnanca è il quartier il pli «giuven», las chasas novas furman la part che sa numna Surses. Donat ha per il mument 148 abitants. Il president communal è *Martin Cantieni*.

La baselgia da qua è vegnida construïda durant il temp medieval, vers la fin dal 17avel tschientiner è ella vegnida renovada e prolungada. Il clutger datescha da l'onn 1718. En vischnanca sa chattan er duas chasas da la famiglia Marchion. Quella entamez la vischnanca, la quala ha sgrafits enturn las fanestras, è vegnida bajegiada 1680. «L'autra, la chasa dal chauderschader, ha cumprà e renovà il ravenda Hans Fontana», declera *Christine Cantieni-Joos*, commembra dal cussegl communal e cassiera. Sco ch'ella quinta han ins duvrà dacurt la chasa veglia per insatge fitg modern: La televisiun svizra ha filmà qua in pèr scenas da «Dragan e Madlaina», il film da *Linard Bardill*.

L'unica scola sutsilvana sin tut il mund

A Donat sa chatta er la scola primara per tut ils uffants da la Muntogna. «Il 1979 han ins fundà l'uniun da scola e fabritgà tar nus la nova chasa da scola», infurmescha ella, «en tut van qua passa 70 scolars a scola e scolina, da quels en 34 da Donat.» Che quai saja l'unica scola en l'idiom sutsilvan, agiunsch'la. Il stgalim superiur da la scola è a Ziràn. Sco ch'ella di vivan a Donat per il mument 41 uffants en la vegliadetgna fin 16 onns, da quels en set pli giuvenns che tschintg onns. Ch'i dettia diversas famiglias bilinguas, «ils uffants creschan si cun tuttas duas linguas e nun han ner nagins problems cun quai». La lingua uffiziala

da Donat è rumantsch. Cunquai che Donat posseda er ina sala polivalenta han lieu qua tut las occurrenzas culturalias da la Muntogna: per exempel ils concerts dal Cor maschadà da Donat e conturns u ils teaters che la societad da giuventegna represchenta pli u main mintg'onn.

Ina stretga collavuraziun

Sco en tut la Val Schons gioga l'agricultura er a Donat ina rolla impurtanta. «Nus avain qua 12, 13 menaschis purils cun blets giuvenns che lavuran en quels», di Martin Cantieni. La megliuraziun ha fatg Donat a l'entschatta dal 1990. Uschiglio datti en vischnanca duas garaschas che cumodan maschinas agriculas ed autos e che fan transports. Sper la posta che vegn manada da sia dunna ha *Christian Hassler* in affar per «energias alternativas». Sia stizun principala ha'l a Ziràn. La vischnanca posseda er ina filiala da la Banca Raiffeisen ed in'ustaria cun hotel. «Ils turists vegnan tar nus surtut per ir a spass e da primavaira per far gitas culs skis.» *Maja Fravi-Loringbett* maina la centrala dal Scarnuz Grischun da la Muntogna da Schons: Var otg dunnas la mainan specialitads grischunas sco turtas da nusch, paun cun païra u andutgels, ed ella las trametta als clients. A Donat abita er il selvicultur da la Corporaziun Muntogna da Schons. Sco che Martin Cantieni declera è la collavuraziun da las vischnancas da la Muntogna fitg stretga.



La baselgia da Donat deriva dal temp medieval.



Christine Cantieni-Joos pavla ses alpakas, ina sort da lama che deriva dal Peru.

Attracziuns sur la vischnanca

Cun construir la via da Donat si vers Casti-Vargistagn han ins chattà 1926 restanzas da fossas miradas dal temp da 1600 avant Cristus.

Pauc toc davent aveva fabritgà l'onn avant l'enconuschent inschigner Robert Maillart la punt Val Tschiel. Da quel deriva er la punt sur la Salgina tranter Schiers e Schuders, construïda 1929/30. Onurada uffizialmain è quella vegnida il 1991. La punt da Salgina è in dals 22 monuments mundials, tar ils quals tutgan per exempel la tur Eiffel a Paris, la statua da libertad a New York u il chanal da Panama.



L'ustaria da Donat sa chatta en il center da la vischnanca.